

Margaret Wever di Museo Arqueologico Aruba

“Movecion den Paisahe” un alternativo recreativo y aventurero pa nos muchanan

ORANJESTAD - Museo Arqueologico Nacional ta bin cu un proyecto vacacional di tres siman pa nos muchanan y hobennan for di 6 aña te cu 17 aña di edad. E programa vacacional aki, esta “Movencion den Paisahe” ta un bon alternativa di recreacion pa tene nos muchanan activo realizando actividad sano y sigur. E ta un solucion pa canalisa e interes di nos muchanan den actividad pro-activo, y evita asina cu nan ta bay riba mal caminda durante e temporada di vakantie aki.

Margaret Wever di Museo Arqueologico Nacional a declara na BON DIA Aruba American Association of Museums tin un programa di Let's Move Museums & Gardens cu

Presidente Barak Obama su casa Michelle Obama a bin cune, y cu a bira un inspiracion pa Museo Arqueologico Nacional y otro instancia lo introduci na Aruba.

Wever a bisa cu Obama a bin cu e programa interesante aki debi na un preocupacion cu e tabatin riba e problema di obesidad cu ta afecta hendenan di tur edad na Merca. Obesidad ta causa hopi problema y consecuencianan no solamente cu e pashent cu ta central, sino tambe pa e sistema di seguro, hospital, dokternan, etc... Museo Arqueologico hunto cu su partnernan manera Museo Historico, Parke Nacional Arikok, UNOCA, Meta Corp y Departamento di Cultura, tin e tarea di informa y educa nos publico, segun

Margaret Wever. “Nos ta tuma esaki comparti di nos tarea”, asina el a bisa. Nan ta conecta cu e informacion cu generalmente como museo arqueologico nan ta suministra na publico di e pasado Amerindio y Aruba.

Pesey nan a traha riba un programa integral cu ta encera e parti di movecion y bon nutricion, pero alabes e ta conecta bek cu e tempo di nos antepasadonan Indjan. E ta bisa cu e programa vacacional aki no lo bira manera un les. E ta un programa vacacional hopi recreativo, hopi dibertido, y e ta sigur cu pa e hobennan e lo ta hopi aventurero. “E ta algo misterioso di cana den un museo y e luznan ta paga...”, e ta algo aventurero pa nos hobennan, asina Margaret Wever a declara. E inscripcion pa e pro-



Margaret Wever

grama vacacional aki ta cuminsa awe y ta clausura riba e dia cu e programa aki ta cuminsa esta dia 11 di juli awor. Interesa pa registracion ppr yama na telefoon 582-8979. E cupo ta hopi limita, ya cu e ta bira 25 mucha pa cada grupo. Lo tin tres grupo, e prome grupo di 14 pa 17 aña lo cuminsa dia 11 di juli te cu 15 di juli for di 6 p.m. te cu 9 p.m. E di dos grupo ta pa muchanan di 10 pa 13 aña,

y e ta cuminsa dia 18 te cu dia 22 di juli. Y e di tres grupo ta pa muchanan entre 6 aña pa 9 aña di edad, y e ta cuminsa dia 27 di juli te cu 1 di augustus. Pero banda si esey nan tin e vakantie camp cu ta biniendo, y si e ta bay bon nan lo sigui ripitie. Te hasta nan tin pensapa bin cu un programa despues di scol al estilo Traimerdia, asina Margaret Wever a bisa na BON DIA Aruba. □